
Si Corsow y St Maarten scohe pa dollar como moneda

Minister Mike de Meza lo bai di acuerdo pa Aruba cambia florin Arubano pa dollar

ORANJESTAD – Si tanto St Maarten y Corsow dicidi pa cambia nan moneda den e dollar mericano, Aruba tambe lo haci esaki. Esei ta declaracion di minister di finanza di Aruba Mike de Meza haci na presidente di Banco Central di Corsow y St Maarten Emsley Tromp, y cu Tromp a relata tambe dialuna durante un presentacion na St Maarten riba e posibel dollarization como alternativa di moneda.

Tabata basa riba un pregunta di un politico di e isla di St Maarten, pakico Aruba no a

cambia pa moneda di dollar ora cu e la haya su Status Aparte na 1986, Tromp a contesta cu e minister di Aruba a informe di e posibilidad aki eventualmente. Como tal esaki ta indica cu a pensa riba esaki y cu tin e posibilidad cu Aruba lo por dolarisa tambe, cu tur e consecuencianan cu esaki por trece cune.

Di otro banda, esaki ta nifica un pensamiento diferente cu esun di Banco Central di Aruba, cu a declara caba cu nan no ta recomenda dolarisacion pa Aruba y cu

de facto a keda sorprendi cu Bonaire si a pasa pa esaki na januari ultimo, como parti di nan status nobo. Dado caso cu Aruba no cambia pa dollar tambe, esei lo nifica cu e lo ta e unico isla den e constelacion caribense hulandes, cu no ta uza e dollar mericano. Esei pasobra ya caba tanto Bonaire como Statia y St Eustatius ta usando dollar. St Maarten y Corsow ainda no, pero tin indicacion cu esaki lo por cambia.

Mientras cu e presidente di Banco Central di Corsow y St Maarten a bisa cu e ta

reconoce cu e florin Antiano tabata hopi stabil ultimo 40 aña, e cambio pa dollar sigur lo ta uno positivo. Esei e la bisa dialuna durante un reunion di comision central di parlamento na St Maarten. Segun Tromp, e pensamiento ta bin for di tempo di e recession global na 2008, unda cu a bisa cu lo tin asuntonan financiero si e islanan lo a continua cu nan importacion extensivo sin exportacion pa genera entrada. Cu dolarisacion, esaki lo elimina e riesgo di devaluacion di e florin Antiano of e florin caribense cu mester drenta

na vigor na 2012, sta otro aña. Mes momento Tromp ta corda tur hende cu Banco Central no ta un fiado di ultimo recurso pa banconan ora cu nan haya nan mes den un situacion precario, pasobra e maneho di e banconan ta surpasa e producto domestico di St Maarten (1.5 biyon) y di Corsow (5.3 biyon).

Cu dolarisacion, esaki lo insula e economia nan chikito y habri di tanto St Maarten como Corsow cu ta asina mas exponi pa shocknan externo segun Tromp.